



*Senin, 17 Juli 2023*  
**Ogen: Masmur 82:3-4**



**"Mperjuangkan Keadilen"**



**D**ibata Bapa si sembah kita e me Dibata si erkuasa lako maba kebenaran bage pe keadilan nandangi kerina tinepaNa. Kebenaren ras keadilanNa i cidahkenNa arah kerina perbahanen lako engkelengi tinepaNa, terlebih kita manusia. Melala pengajaren kerna ndalanken kebenaran ras keadilan si isuratken ibas Pustaka Si Badia. Pemasmur ningetken ibas masmur 82:3-4 gelahna selaku tinepa si itepa Dibata mulia, meherga rikutken tempasNa, banci ndalanken kebenaran bage pe keadilan nandangi tinepa Dibata si lit i babo doni enda. Belalah hak anak-anak melumang jenari bahanlah adil kempak kalak musil dengen mesera. Anak-anak melumang ras kalak mesera baban geluhna megati jadi korban kinilaadilen i tengah-tengah doni enda. Megati nge si idah perbahanen si la ngergaken jenari erbahan la adil man kalak melumang bage pe kalak si musil, si buat bagin si arusna e jadi bagin anak-anak melumang. I bas perdalanen geluhta sadar entah la sadar kita, perbahanennta la adil. Contoh si kitik saja, caranta ngajarken ras mperdiateken anak-anak i jabunta, seh maka lit nge penggejapen anak-anak e, maka kita selaku orangtua megati la adil ibas ndidik bage pe ngajarken anak-anakta.

Wari enda kita iingetken mulihi guna mperjuangkan keadilan. Mperjuangkan keadilan banci siciidahken arah kita ngergaken teman-teman si lit isekelewetta, mediate nandangi kegeluhen teman-teman, ras sidebanna. Selaku kita tinepa Dibata, sipakekenlah kinibeluhen, kinilitennta lako mperjuangkan keadilan i tengah-tengah kegeluhennta.